

Headlines

1. विक्रमी कलंडर दी शुरूआत ते जम्मू संभाग च रबी फसलें दी बाडी कन्नै जुड़े दा त्यौहार बसाखी जोश जज्वे कन्नै मनाया गेआ।
2. देश भारती संविधान दे मुख्क निर्माता डॉ. बी.आर अम्बेडकर होरेंगी उंदी 136मीं जयंती पर अज्ज उनेंगी शरदांजलि भेंट करा'रदा ऐ।
3. प्रधानमंत्री नरेंद्र मोदी होरें आखेआ जे नीति निर्माण च महिलाएं दी हिस्सेदारी विकसित भारत बक्खी जात्तरा गी मजबूत करदी ऐ।
4. उपराज्यपाल होरें समाज दे हर वर्ग गी नशे खलाफ लड़ाई च शामिल होने दी अपील कीती।
5. नशामुक्त अभियान दे 100 ध्याडे तैहत सुरक्षाबल प्रदेश दे सरहदी इलाकें च ड्रग्स दी सप्लाई चैन गी खत्म करने लेई ड्रग माफिया दी नकेल कसडन।



Baisakhi

विक्रमी कलंडर दी शुरूआत रबी फसलें दी बाडी दा मौसम ते खालसा पंथ दी स्थापना दिवस दा त्यौहार बसाखी जिसे आम तौरा पर बसोआ बी गलाया जंदा ऐ, अज्ज जम्मू संभाग च रिवायती अंदाज ते जोश-जज्वे कन्नै मनाया जा'रदा ऐ। एहू त्यौहार सांस्कृतिक, धार्मिक ते समाजी महत्व रखदा ऐ। जम्मू दे नेकें ग्राएं मोह्डें च करसानें ढेल दी थाप ते रिवायती संगीत कन्नै कनक दी बाडी रम्भ कीती। बसाखी गी खुशहाली ते नमीं शुरूआत दा प्रतीक बी मन्नेआ जंदा ऐ। इस मौके परम्परा मताबक नेकें लोकं रणबीर नहर, तवी, चनाब, रावी, बसंतर ते उधमपुर च पवित्तर देवक नदी च चलोबी लाई जिल्ले के नेकें परमंडल ते उत्तरबहनी आहले धार्मिक थाहरें पर जाइये भगवान दी पूजा कीती। तवी नदी दे खब्बे कंडे पर बावे आहले किले कश हर की पोड़ी पर बडुलै मूंह न्हरे थमां भक्तें दी मती भीड़ दिक्खी गई। अखनूर च बी बड़ी बहू गिनतरी च लोकें चनाब च पवित्तर चलोबी लाई। पैहले मुख्क मेला हर बरे कैनाल रोड कंडे लगदा हा, पर इस बारी मुख्क कार्यक्रम जम्मू सैलसफा मैहकमा ते जम्मू स्मार्ट सिटी लिमिटेड नै तवी रीवर फ्रंट पर आयोजित करोआया। जम्मू-कश्मीर दे उपराज्यपाल मनोज सिन्हा अज्ज संझालै एहदा उद्घाटन करा करदे न ते ओहू तवी कंडे तवी आरती समारोह च बी शामिल होडन। तोआई जम्मू नगर निगम दे सी.ई.ओ देवांश यादव होरें आकाशवाणी कन्नै गल्ल करदे होई आखेआ जे एहू कार्यक्रम टकोहदे तौरा पर बसाखी दे शुभ मौके पर जम्मू दे लोकें ताई आयोजित कीता गया ऐ। उनें आखेआ जे इस पहल कन्नै सैलसफे गी बढावा थ्होग ते रोजगार दे मौके पैदा होडन। उनें आखेआ



Devika

उधमपुर जिले च पवित्तर देविका नदी दे कंडे ऐतिहासिक 3 रोजा देविका बसाखी मेले दा अज्ज शुरूआत बडै उत्साह ते जोश कन्नै होई। एहदा आयोजन उधमपुर दे उपायुक्त मिंगा शेरपा हुंदी दिक्ख-रिक्ख च कीता गेआ। जिला प्रशासन नै मेले दे सुचारू संचालन लेई बिजली, साफ पानी, साफ-सफाई, सेहत सरबन्धी सहूलतां, नियंत्रण कक्षें ते निगगर सुरक्षा उपाएं सने लोडचदी बवस्थाकीती दी ही। इस पवित्तर देविका नदी च चलोबी लाने लेई दूरै-दूरै थमां श्रद्धालु इत्थे पुज्जे दे हे। अपनी खुशी जाहिर करदे होई किश यात्रुएं आखेआ



Dr. B.R.Ambedkar

भारती संविधान दे मुख्ख निर्माता डॉ. बी.आर अम्बेडकर हुंदी अज्ज 136मीं जयंती मौके राष्ट्र उनेंगी श्रद्धांजलि अर्पित करा करदा ऐ। इस मौके पर समूलचे देशै च नेकें कार्जक्रमें दा सरिस्ता कीता गेआ। राष्ट्रपति द्रोपदी मुर्मू होरें गुजरात दे गांधी नगर च लोकभवन च बाबा साहेब हुंदी तस्वीर पर फुल चढाए। उपराश्ट्रपति सी.पी राधाकृष्णन, प्रधानमंत्री नरेंद्र मोदी, लोकसभा स्पीकर ओम बिरला, राज्यसभा च विपक्ष दे नेता मल्लिकार्जुन खड्गे, केंद्री मंत्रियें ते सांसदें बी अम्बेडकर जयंती दे मौके पर संसद परिसर च प्रेरणा स्थल पर डॉ. अम्बेडकर होरें गी श्रद्धांजलि दिती। उपराज्यपाल मनोज सिन्हा, मुख्खमंत्री उमर अब्दुल्ला ते होर दुए मंत्रियें भारती संविधान दे शिल्पकार ते समाज च सुधार आह्नेने आह्ले लीडर दे रूपै च उंदी भूमिका पर लो पाई। श्री सिन्हा होरें उनेंगी भारत दे समाजी ते राश्ट्री मुल्लें च बदलाव लेआने आह्ले ते दबोए-लतडोए दे लोकें दा समार्थक दस्सेआ जिल्ले के उमर अब्दुल्ला होरें उंदी भारत दे लोकतंत्र गी आकार देने आह्ले उंदी महत्वपूर्ण भूमिका उजागर कीती।

<><><><><><>

Ambedkar

बाबा साहेब हुंदी जयंती जम्मू च बी जोश जज्वे कन्नै मनाई गेई। भीम क्रांति सेना जम्मू-कश्मीर नै जयंती मनाने आस्ते जम्मू च इक्क बड्डी कार ते बाइक रैली कड्डी, जेडी बी.आर अम्बेडकर चौक पुज्जियै सम्पन्न होई। जम्मू यूनिवर्सिटी च एस.सी, एस.टी ते ओबीसी सैल नै भारत रत्न बाबा साहेब बी.आर अम्बेडकर, आधुनिक भारत दे निर्माता गी सिरलेख कन्नै सेमीनार दा सरिस्ता कीता जेदे च प्रो. उमेश राय होरें मुख्ख भाशण दिता। अम्बेडकर वेलफेयर ट्रस्ट नै बी उधमपुर च चायं-चायं इक्क कार्जक्रम दा सरिता कीता, जेदी शुरूआत गुरू रविदास मंदर एम.एच चौक थमां शुरू इक्क बड्डी बाइक रैली कन्नै होई। इस मौके पर बोलदे होई डीआईजी शिव कुमार शर्मा होरें आखेआ

<><><><><><>

Poshan

पेषण ट्रेकर एप्लीकेशन पोषण अभिजान तैहत 14 लक्ख शा बद्द आंगनवाडी केंद्रें ते तकरीबन 9 करोड लाभार्थियें दी निगरानी करा'रदा ऐ। पोषण अभियान भारत दा मुख्ख राश्ट्री पोषण मिशन ऐ जेदा मकसद तालमेल, टेकनालजी ते सामुदायिक डाटा संग्रह रायं पोषण नतीजें च सुधार करना ऐ। 2021 च रम्भ कीते गेदा पोषण ट्रेकर बुनियादी ढांचे ते सेवा बंड दी निगरानी आस्ते प्राथमिक शासन उपकरण दे तौरा पर कम्म करदा ऐ। इस ऐप नै आंगनवाडी सेवा लेई असल समा डेटा संग्रह गी सखल्ला बनाया ऐ जेदे च आंगनवाडी केंद्रें दी शुरूआत, बच्चें दी रोजाना हाजरी ते विकास निगरानी शामिल ऐ। महिला ते विकास मंत्रालय मताबक मौजूदा समें च एहू प्रणाली भटेयाली महिलाएं, न्याणें गी दुध पलेयाने आह्लियां माता 6एं बरें तगर दे बच्चें ते किशोरें दी निगरानी करा'रदी ऐ।

<><><><><><>

Viksit-Bharat-2047

प्रधानमंत्री नरेंद्र मोदी होरें आखेआ ऐ जे महिलाएं दे नीति-निर्माण ते फैसले लैने च सक्रिय हिस्सेदारी कन्ने 2047 तगर विकसित भारत दी जातरा दा नजरिया होर निगगर होई जाह्ग। भारत दी नारी शक्ति गी लिखे दे खत च श्री मोदी होरें आखेआ जे 16 अप्रैल गी संसद, नारी शक्ति वंदन अधिनियम कन्नै सरबंधत महत्वै आह्ले संवैधानिक तरमीम पर चर्चा ते उसी पारित करने लेई परतियै इजलास रम्भ करोग। प्रधानमंत्री होरें आखेआ जेकर 2029 दे लोकसभा चुनां ते बक्ख-बक्ख विधानसभा चुनां, महिलाएं ताई पूरी चाल्ली लागू होंदे न ते देसै दा लोकतंत्र होर मजबूत होग। उनें आखेआ जे इस कनून गी पास करने च देरी मंदे भागें आह्ले ते महिलाएं कन्नै अन्याय होग। श्री मोदी होरें आखेआ जिसले देस दियें विधानसभाएं च महिलाएं दी आवाज मजबूत हुंदी ऐ, उसलै लोकतंत्र दी अवाज बी मजबूत होई जंदी ऐ। प्रधानमंत्री होरें आखेआ जे जमीनी सतह पर नेकें स्वयं सहायता समूहें ते लखपति दीदियां एहू साबत करा'रदियां न जे आत्मनिर्भरता किस चाल्ली हासल कीती जाई सकदी ऐ ते होर दुइयें महिलाएं गी किस चाल्ली बाइखित्यार बनाया जाई सकदा ऐ।

<><><><><><>

LG-Against Drugs

उपराज्यपाल मनोज सिन्हा होंरें समाज दे हर तबके अगरे नशीली दोआइयें दे गलत इस्तेमाल खलाफ लड़ाई च शामिल होने दी अज्ज अपील कीती। ध्यानजोग ऐ जे श्री सिन्हा होंरें 11 अप्रैल गी एम.ए स्टेडियम जम्मू थमां ड्रग फ्री जम्मू कश्मीर ताई इक्क ऐतिहासिक जन आंदोलन रम्भ कीता हा। इस मुहिम दा मकसद 100 दिनें दे नशामुक्त अभिजान दरान जम्मू-कश्मीर गी नशीले पदार्थें थमां मुक्त बनाना हा। एल.जी होंरें यू.टी पुलस ते होर दुइए सुरक्षा एजेंसिएं गी ड्रग माफिया पर टकोहदा करियै सरहदी जिलें च बड़ी कार्रवाई करने दे निर्देश दित्ते तां जे इंदी सप्लाई चेन गी त्रोटियै एहदे पर रोक लाई जाई सकै।

<><><><><><>

100 Days Drugs DIG

जम्मू-साम्बा- कठुआ रेंज दे डी.आई.जी श्रीधर पाटिल होंरें आखेआ जे उनें सप्लाई चेन पर रोक लाइयै पूरे इलाके च नशीले पदार्थें गी अगरे पजाने पर रोक लाइयै ड्रग्स दे खतरे गी खत्म करने दी पूरी कोश्ट करने दा फैसला लैता ऐ तां जे कोई बी आमदन ड्रग्स पेडलर यानि नशीले पदार्थ बेचने आहला जा तस्क बची नेई सकै। ध्यानजोग ऐ जे जम्मू-कठुआ ते साम्बा जिले गोआंडी देस पाकिस्तान कन्नै अंतरराष्ट्री सरहद सांझी करदे न। श्रीधर होंरें आखेआ जे सुरक्षा बल, पुलिस ते होर दुइयां सरबंधत एजेंसियां 100 दिनें अंदर-अंदर जम्मू-कश्मीर गी नशामुक्त इलाका बनाने आस्तै रलियै कम्म करा करदियां न।

<><><><><><>

Fire

जम्मू च अगग साहलने आहले फायर एंड एमरजेंसी सेवा विभाग आसेआफायर सर्विस दिवस दे मौके पर इक्क विशेष कार्यक्रम दा आयोजन कीता गेआ। कर्तव्य निभांदे होई अपनी जान मोहाने आहले वीर दमकल कर्मियें गी इस मौके उप्पर श्रद्धांजलि अर्पित कीती गेई ते उंदी दलेरी ते बहादुरी गी चेत्ता कीता गेआ। इस मौके पर मुतल्लका अधिकारिएं ते कर्मचारिएं अगग थमां बचा दे महत्व उप्पर लोऽ पाई। इस कार्यक्रम दे कन्नै गै फायर सर्विसस वीक यानि के अग्रिशमन सेवा सप्ताह दा बी शुभारम्भ बी होआ जेडा 14 शा 20 अप्रैल तगर अगग थमां सुरक्षा ते बचाव सरबंधी उपाएं दे बारै च जागरूकता फैलाने लेई मनाया जारदा ऐ। एहदे बारै गल्ल करदे होई कांस्टेबल फायर सर्विसस जम्मू एम.एस मन्हास होंरें आखेआ

<><><><><><>

IPL

आई.पी.एल क्रिकेट च चेन्नई सुपर किंग्स दा मुकाबला अज्ज संझा साड्डे 7 बजे कोलकाता नाईट राइडर्स कन्नै होगा। कल हैदराबाद च सनराइजर्स हैदराबाद नै राजस्थान रायल्स गी 57 रन कन्नै हराई दित्ता हा। पैहले बल्लेबाजी करदे होई सनराइजर्स हैदराबाद नै 20 ओवरें च 6 विकेटां गोआइयै 216 रन बनाए जदके राजस्थान रायल्स 19 ओवरें च छडी 159 गै बनाइये आलआउट होई गेई।

<><><><><><>